

HIJRAH HATI DEMI KEBAIKAN DIRI

Oleh: Mohamad Najmi Ammar bin Abdol Rasip, 1171836,
Fakulti Kepimpinan dan Pengurusan (FKP), Universiti Sains Islam Malaysia (USIM)
Disiarkan pada 19 Ogos 2020

Hijrah merupakan fenomena yang begitu luar biasa saat ini, begitu sering kita mendengarkan istilah itu disebut oleh pelbagai pihak.

Ibnu Rajab al-Hanbali dalam Fathul Bari menjelaskan, hijrah adalah meninggalkan dan menjauhi keburukan untuk mencari, mencintai dan mendapatkan kebaikan.

Rasulullah SAW bersabda, “Orang yang sebenar-benar hijrah ialah orang yang berhijrah meninggalkan apa-apa yang dilarang oleh Allah.” (Riwayat al-Bukhari, Abu Daud dan al-Nasaie)

Dari sudut hati, hijrah pastinya membawa seribu erti untuk diungkap dengan setiap perbuatan baik yang dilakukan.

Apakah sekadar cukup seseorang itu beragama Islam sahaja namun pada masa yang sama, mengabaikan setiap perkara yang perlu dilakukan sebagai seorang Muslim?

Masih ramai dalam kalangan kita yang terus alpa dan leka dibuai dunia. Berapa ramaikah di antara kita yang masih belum memahami aturan hidup sebagai Muslim?

Benarlah sabda Rasulullah SAW, “Akan datang umat-umat yang berkerumunan ke atas kalian seperti kerumunannya orang-orang yang makan pada satu pinggan. Maka seorang bertanya: “Apakah jumlah kami pada ketika itu sedikit?” Baginda s.a.w menjawab: “Bahkan jumlah kamu pada saat itu ramai. Akan tetapi keadaan kamu seperti buih-buih di lautan. Dan sesungguhnya Allah akan mencabut dari (hati) musuh-musuh kamu rasa takut terhadap kamu serta akan ditimpakan (penyakit) al-Wahn di dalam hati-hati kamu. Para sahabat bertanya:

“Wahai Rasulullah! Apakah al-Wahn?” Baginda menjawab: “Cinta kepada dunia dan takut mati.” (Riwayat Abu Daud)

Hijrah hati sangat perlu kerana setiap daripada kita adalah pendosa. Tidak kira apa jua latar belakang setiap hamba itu dinilai pada ketakwaannya kepada setiap tuntutan agama.

Jika kita hanya berhijrah dari segi penampilan, itu hanyalah secara zahirnya sahaja, sedangkan hati, rohani dan sifat-sifat mazmumah yang ditampilkan itu menjadikan kita tidak seimbang.

Kita tetap akan mengulangi perbuatan buruk tersebut. Apabila dalaman telah bersih, maka luaran juga akan mengikut sama.

Antara tips yang boleh dijadikan panduan bagi mereka yang ingin melakukan hijrah hati adalah dengan mencari guru agama, menghadiri majlis ilmu serta bergaul dengan orang yang soleh.

Memetik kata kata sarjana Islam, Imam al-Ghazali, “Hati itu ibarat raja, manakala anggota-anggota zahir ibarat rakyat. Jika baik hatinya maka baiklah keseluruhan tubuhnya.”

Hijrah bukan untuk orang yang berdosa sahaja, tetapi sebenarnya untuk kita semua. Semak semula hati kita di mana silapnya dan perbetulkan.

